

L ladin tel cher e na plus biencia endos

La Procuradora Cristina Donei enstadi à fat vijita ai Volontadives del lengaz per ge sporjer la neva mondura



Poza - "No l'è fior zenza reisc" l'è chest che l'è scrit tedò la neva plus di volontadives del lengaz, n grop che da doi egn se dèsc jù acioche noscia parlèda, nosc bel lengaz fascian no vegne desmentia.

N grop n muie engaisà e pien de bona scomenzadives che à piajer de se troèr n'outa ogne chinsc dis per tratèr i più desvalives argomenc. L'obietif l'è chel de rejonèr fascian e l'è a na vida lijiera, desche se se troassa tedant a n café te n bar a ciacoler de dut e de più.

L grop l'è stat metù sù a la fin del 2008 su l'idea de l'esperienza positiva de la Catalunya olache chesta sort de scomenzadives è atives da più temp e è bones de aer na gran adejion.

Te Fascia, ponté via dal lurier de Sabrina Rasom, duc ensema se è stac bog de arjonjer de bog resultac. I volontadives no i à confins, i vegn da duta la val, da tinsom Penia fin ja Moena. Jent grana ma ence bec picoi, jent dal post e ence foresc che vif da egn chiò te val o parenc de fascegn che se aea maridà al lont. Béleche vint persones anchecondi fèsc pèrt de chest grop e te giusta doi egn l'è stat arjont de bog ejic frut de la pascion di "volontadives" per l ladin. Una de la più gran sodesfazions l'è stat la traduzion per fascian de la cianzon "Imagine" de John Lennon.

Dò dut chest zacan l'è ruà ence l moment del recognosciment ofizial da man de la istituzions. En mèrtesc ai 5 de otober l'è stat na di zis emportanta e che vegnarà

recordèda da dut l grop con gran piajer. La Procuradora de Fascia Cristina Donei la é jita a i troèr con chela de ge sporjer na mondura a duc i membres. Na plus biencia con tedò l slogan "No l'è fior zenza reisc" e da la man del cher l'è na bandiera ladina con l'inom del grop "I volontadives del lengaz".

La scontrèda l'è stat no demò n moment de festa ma ence n moment de lurier olache l'è stat tout sù desvalives obietives per l'invèrn che vegn. L program sarà chel de meter ensema n concors per na Contia de Nadèl, traslatèr tesé desche poejes o cianzons; se enventèr parola encrojàdes, jeghes de paroles e etres passatempes; se endrezèr per ruèr a aer n cianton di volontadives su chest sfoi, sensibilisèr l'aministrazions de Fascia envers l grop, proèr a spenjer acioche ence te la boteighes se rejone per fascian e, desche l'an passà, tor pèrt a la Maratona de letura a l'Aisciuda Ladina. Dut chest fat a na vida che l'obietif de basa sie chel de rejonèr più che l'è meso fascian te la vita de duc i dis. I ujes di volontadives del lengaz i é ampò averc a duc e ve arsegnore che apede ic, en compagnia di volontadives se stèsc n muie sori. L'è n clima aieghe e piagegol olache duc pel dir che che i peissa zenza tema, palesan chel che più se à piajer. En mèrtesc che vegn, da mesa les 9 l grop se binarà endò.

Per aer amò vèlch informazion sul grop e se scriver ite se pel ence jir sul sit internet www.c11.tn.it olache l'è na pèrt dedichèda ai volontadives del lengaz. (vr)



I volontadives del lengaz con sia neva plus biencia.